

宣是也一左丞皇甫銑是也一郡王瑀是也一
開府力士是也遺評補博卿監司舍將軍列卿
州牧縣宰已下散在諸郡不可盡紀從至德至
寶應向二千人及承恩放還十二三矣嗟乎淫
刑以逞誰得無罪湜同病者報以誌之况與高
公俱嬰譴累每接言論敢不書紳豈謂懷輔弼
之元勳當休明之聖代卒爲讒佞所惡生死銜
冤悲夫

東城老父傳

唐 陳鴻祖 撰

老父姓賈名昌長安宣陽里人開元元年癸丑
生元和庚寅歲九十八年矣視聽不衰言甚安
徐心力不耗語太平事歷歷可聽父忠長九尺
力能拽倒牛以材官爲中宮幕士景龍四年持
幕竿隨玄宗入太明宮誅韋氏奉睿宗朝羣后
遂爲景雲功臣以長刀備親衛詔徙家東雲龍
門昌生七歲趨捷過人能搏柱乘梁善應對解

鳥語音玄宗在藩邸時樂民間清明節聞鷄戲
及卽位治鷄坊于兩宮間索長安雄鷄金毫鐵
距高冠昂尾千數養于鷄坊選六軍小兒五百
人使馴擾教飼上之好之民風尤甚諸王世家
外戚家貴王家侯家傾帑破產市鷄以償鷄值
都中男女以弄鷄爲事貧者弄假鷄帝出遊見
昌弄木鷄於雲龍門道傍召入爲鷄坊小兒衣
食右龍武軍三尺童子入鷄羣如狎羣小壯者
弱者勇者怯者水穀之時疾病之候悉能知之

舉二雞雞畏而馴使令如人護雞坊中謁者王
承恩言於玄宗召試殿庭皆中玄宗意卽日爲
五百小兒長加之以忠厚謹密天子甚愛幸之
金帛之賜日至其家開元十三年雞籠三百從
封東嶽父忠死太山下得子禮奉尸歸葬雍州
縣官爲葬器喪車乘傳洛陽道十四年三月衣
鬪雞服會玄宗于溫泉當時天下號爲神雞童
時人爲之語曰生兒不用識文字鬪雞走馬勝
讀書賈家小兒年十三富貴榮華代不如能令

金鉅期勝負白羅繡衫隨軟輦父死長安千里
外差夫特道挽喪車昭成皇后之在相王府誕
聖於八月五日中興之後制爲千秋節賜天下
民牛酒樂三日命之曰酺以爲常也大合樂於
宮中歲或酺於洛元會與清明節率皆在驪山
每至是日萬樂具舉六宮畢從昌冠鵬翠金華
冠錦袖繡襦袴執鐸拂導群雞敘立于廣場顧
眄如神指揮風生樹毛振翼礪吻磨距抑怒待
勝進退有期隨鞭指低昂不失昌度勝負旣決

強者前弱者後隨昌鵬行歸于雞坊角舐萬夫
跳劔尋撞蹴毬踏繩舞于竿顛者索氣沮色遠
巡不敢入豈教猱擾龍之徒歟二十三年玄宗
爲娶梨園弟子潘太同女男服珮玉女服綉襦
皆出御府昌男至信至德天寶中妻潘氏以歌
舞重幸於楊貴妃夫婦席寵四十年恩澤不渝
豈不敏於伎謹於心乎上生於乙酉雞晨使人
朝服鬪雞兆亂於太平矣上心不悞十四載胡
羯陷洛潼關不守大駕幸成都奔衛乘輦夜出

便門馬蹕道穿傷足不能進伏入南山每進雞
之日則向西南大哭祿山往年朝于京師識昌
於橫門外及亂二京以千金購昌長安洛陽市
昌變姓名依于佛舍除地擊鍾施力于佛洎太
上皇歸興慶宮肅宗受命于別殿昌還舊里居
室爲兵掠家無遺物布衣顛頓不復得入禁門
矣明日復出長安南門道見妻兒於招國里菜
色黧馬兒荷薪妻負故絮昌聚哭訣于道遂長
逝息長安佛寺學大師佛旨大曆元年依資聖
寺大德僧運平往東市海池立陀羅尼石幢書
能紀姓名讀釋氏經亦能了其深義至道以善
心化市井人建僧房佛舍植美草甘木書把土
擁根汲水灌竹夜正觀于禪室建中三年僧運
平人壽盡服禮畢奉舍利塔于長安東門外鎮
國寺東偏手植松栢百株構小舍居于塔下朝
夕焚香灑掃事師如生順宗在東宮捨錢三十
萬爲昌立大師影堂及齋舍又立外屋居游民
取傭給昌因日食粥一杯漿水一升卧草席絮


衣過是悉歸於佛妻潘氏後亦不知所往真元
中長子至信衣并州甲隨大司徒燧入覲省昌
于長壽里昌如已不生絕之使去次子至德歸
販繒洛陽市來往長安間歲以金帛奉昌皆絕
之遂俱去不復來元和中穎川陳鴻祖攜友人
出春明門見竹栢森然香煙聞於道下馬覲昌
於塔下聽其言忘日之暮宿鴻祖於齋舍話身
之出處皆有條貫遂及王制鴻祖問開元之理
亂昌曰老人少年以鬪雞求媚于上上倡優蓄

之家于外宮安足以知朝廷之事也然有以爲
吾子言者老人見黃門侍郎杜暹出爲碯西節
度攝御史大夫始假風憲以威遠見哥舒翰之
鎮涼州也下石堡戍青海城出白龍逾葱嶺界
鐵關惣管河左道七命始攝御史大夫見張說
之領幽州也每歲入關輒長轅輓輻車輦河間
薊州傭調繒布駕鞬連軌全入關門輸于王府
江淮綺縠巴蜀錦繡後宮玩好而已河州燉煌
道歲屯田實邊食餘粟轉輸靈州漕下黃河入

太原倉儲關中凶年關中粟麥藏于百姓天子
幸五嶽從官千乘萬騎不食於民老人歲時伏
臘得歸休行都市間見有賣白衫白疊布行隣
比鄠間有人襍病法用皂布一匹持重價不克
致竟以幘頭羅代之近者老人扶杖出門闕街
衢中東南西北視之見白衫者不滿百豈天下
之人皆執兵乎開元十二年詔三省侍郎有缺
先求曾任刺史者郎官缺先求曾任縣令者及
老人見四十三省郎吏有理 才名大者出刺

郡小者鎮縣自老人居大道傍往往有郡太守
休馬于此皆慘然不樂朝廷沙汰使治郡開元
取士孝悌治人而已不聞進士宏詞拔萃之爲
其得人也大略如此因泣下復言曰上皇非臣
窮盧東臣雞林南臣滇池西臣昆夷三歲一來
朝會視之禮容照之恩澤衣之錦絮飫之酒食
使展事而去都中無留外國賓今北胡與京師
雜處娶妻生子長安中少年有胡心矣吾子視
首飾華服之制不與向同得非物妖乎鴻祖默

不敢應而罷去



古鏡記

隋王度撰

隋汾陰侯生天下奇士也王度常以師禮事之
臨終贈度以古鏡曰持此則百邪遠人度受而
寶之鏡橫徑八寸鼻作騏驎蹲伏之象遶鼻列
四方龜龍鳳虎依方陳布四方外又設八卦卦
外置十二辰位而具畜馬辰畜之外又置二十
四字周遶輪郭文體似隸點畫無缺而非字書
所有也侯生云二十四氣之象形承日照之則